



SULTAN SHARAFUDDIN IDRIS SHAH berkenan beramah mesra dengan sebahagian pelajar baharu dalam Majlis Ikrar Pelajar Baharu di UPM, Serdang, Selangor, semalam. Turut hadir Mohd. Fauzi Ramli (kanan). - BERNAMA

Sultan Selangor saksi lafaz ikrar pelajar baharu UPM

KUALA LUMPUR 2 Sept. – Sultan Selangor, Sultan Sharafuddin Idris Shah hari ini berkenan mendengar dan menerima perakuan lafaz ikrar 2,727 pelajar baharu Universiti Putra Malaysia (UPM) bagi kemasukan sesi akademik 2015/2016.

Majlis lafaz ikrar itu merupakan yang julung kali diadakan dengan keberangkatan baginda yang juga Canselor universiti berkenaan.

Lafaz ikrar tersebut dibacakan oleh wakil pelajar baharu, Mohd. Noraiman Mohd. Fadzil.

Berucap dalam majlis itu, Naib Canselor UPM, Prof. Datuk Dr. Mohd. Fauzi Ramli berkata, keberangkatan baginda pada majlis berkenaan melakar sejarah baharu dalam perjalanan panjang sebuah universiti yang sentiasa bercita-cita untuk terus maju dan berjaya

di persada antarabangsa.

“Setelah mengharungi perjuangan lebih lapan dekad, UPM gagah berdiri sebagai salah satu universiti penyelidikan.

“Selain itu UPM menduduki tangga ke-376 universiti terbaik dunia, tempat ke-54 dalam bidang pertanian serta tangga ketujuh di peringkat Asia dan pertama di Asia Tenggara,” katanya.

Pelajar-pelajar baharu yang berjaya ditawarkan tempat di universiti itu merupakan antara 128,000 calon yang memohon kemasukan ke UPM termasuk tujuh atlet hoki negara selain tiga pelajar Orang Asli dan empat pelajar orang kurang upaya (OKU) serta 176 pelajar antarabangsa.

Dalam pada itu, Mohd. Fauzi berkata, tradisi lafaz ikrar tersebut

but perlu difahami pelajar bukan sekadar menzahirkan upacara, tetapi menuntut setiap pelafaznya menerima amanah tanpa syarat dan bertanggungjawab menjaga nama baik institusi sepanjang masa.

Kata beliau, setiap pelajar universiti itu wajib memelihara imej baik universiti dalam setiap tindakan dan tingkah laku.

“Bersempena bulan kemerdekaan ini, saya turut menyeru agar semua pelajar baharu dapat meletakkan kecintaan kepada negara tanpa rasa berbelah bahagi.

“Dengan berpaksikan Rukun Negara dan penuh tekad menanamkan semangat kesetiaan kepada raja dan negara, negara ini akan terus aman, damai dan berjaya,” katanya.